

Folgen die Nyde : auff einen jeden obbemelten Hertz Amptman.

Der Zehentner Nydt.

Ich N. schwere / Das ich will meinem Zehentner Ampt /
treulich vnd fleissig vorstehen / die Churfürstliche gerecht-
tigkeit / vnd der gewercken gutt / was mir des einzunemen /
vnd auszugeben eingebunden ist / jederman seine gerechtigkeit
eigentlich vorsammeln / redliche vnd genugsame rechnung vnd
entrichtung dauon thun / meins gnedigisten Herrn Ordnung
festiglich handthaben / die vor mich selbst halten / vnd wue ich die
übergangen befinde / warnen vnd ansagen / keinerley nutz odder
genies / dann der mir von mein gnedigisten Herrn zugelassen ist /
in dem allen gewartē / mich auch wider dis alles / kein nutz / gabe
gunst / freundschaftt oder feindschaftt / bewegen lassen / Son-
dern wil solchs alles / nach meinem besten vormögen / halten /
treulich vnd vngesährlich / Als mir Gott helff vnd sein Heiliges
Wort.

Des Berckmeisters Nydt.

Ich N. schwere / das ich will meinem gnedigisten Herrn
dem Churfürsten zu Sachsen zc. getraw vnd gewertig
sein / das Berckmeister Ampt / treulich vnd fleissig vorwe-
sen / seiner Churfürstlichen gnaden gerechtigkeit handthaben /
der gewercken vñ gemeines Berckwergs nutz fördern / jederman
was sich von recht vnd billigkeit eigent / gestatten vñ vorhelffen
meins